

清光緒朝中法交涉史料

卷十七之卷十八
光緒十年

清光緒朝中法交涉史料卷十七

(五九三) 福州將軍穆圖善等奏閩省辦防及法
經過廈門情形摺

光緒十年五月十六日到
光緒十年四月二十六日發

福州將軍臣穆圖善閩浙總督臣何璟福建巡撫臣張兆棟跪奏為遵旨覆陳閩省辦理海防及法國兵船經過廈門情形恭摺仰祈聖鑒事竊照本年四月初八日奉寄諭穆圖善久歷戎行著會同何璟將福建防務切實籌辦等因又於十三十七兩日欽奉寄諭二道以法國兵船捌隻過廈門向北開駛確實著即探明具奏臺灣地屬偏隅尤為彼族所覬覦著穆圖善何璟張兆棟督飭將領及地方官整頓防軍固結民心實力防守務臻嚴密各等因欽此欽遵伏查閩省籌辦海防業經四次奏奉批旨復於四月初三日第五次會摺具奏在案臣穆圖善蒙恩鎮守閩疆並司關樞與臣璟臣兆棟近在同城平時已遇事必商籌防以來尤無事不公分商酌會銜入告凡心力所能及即屬職分所當為迺復上煩宸廑眷懷南顧奉臥薪嘗膽之諭並令臣等感愧涕零矣閩省海口林立備多則力分不得不擇要布置如福州為省會根本重地五虎門以內節節扼紮水陸營勇將及萬人廈門一口有新舊陸勇四營水勇兩營佐以練兵民團統由水師提督彭楚漢調度漳州泉州兩府分駐六營以

固廈門後路福寧府駐兩營興化府駐一營各顧海口兼靖內江臺灣議分五路設防新舊
兵勇已二萬人較之從前防倭專顧琅璫一隅調勇至三十餘營則現在分布全台兵力尙
不爲厚而限於餉力勢難再增臺地民氣強固向稱可用應辦水陸聯團臺南北統飭認真
經理俾輔兵力之不逮此外修築礮臺及購備軍火糧食一切事宜節經奏明籌辦第防海
不可無戰船閩省前集鉅款由德國定購鐵甲輪船至今尙未來華現留省港者僅揚武一
兵輪福勝建勝兩蚊船再閩廠所成各輪船除分撥各省外臺南有萬年清伏波兩船臺北
有永保琛航兩船往來絡繹廈門則駐有振威長勝兩船各該船或泊或小或係商輪足供
轉運遞文報而已外洋鎗礮日新月異前接總理各國事務衙門函示已動用出使經費定
購新式鎗礮備各省防軍之用臣等卽函商署直隸督臣李鴻章分撥大後膛鋼礮十尊哈
乞開思毛瑟後膛槍各二千五百桿仍由閩籌還價值現在尙未領到臣等愚見旣無堅利
巨艦堪以出戰一早有警計惟堅守各礮臺水陸互相策應阻以水雷木礮鐵練等物一至
淺港則以杉板水勇禦之陸路則分紮勁旅聯絡民團出奇制勝布置已粗具規模然如御
史趙爾巽所奏天津上海廣東等處礮臺巨礮尙不足深恃閩省素號瘠區勉力籌防更不
敢謂確有把握至法國兵船過廈門北駛一節查自本年正月起至現在止據廈防同知陸

續申報該國戰輪船進口共有八隻先後出口者七隻其中三隻往香港四隻往上海有無北駛無從確探尙有一隻泊鼓浪嶼至今未開別無動靜現交夏令廈門則口敵水深輪船最喜停泊巨礮皆可及岸臺灣惟安平口有波浪之險他口無之且地勢袤長處處濱海實屬防不勝防澎湖基隆等口業已嚴申儆備所目視歆然者無鐵甲船以資捍衛耳刻雖事機稍緩臣等自當懷遵諭旨督飭將領及地方官整頓防軍固結民心以期有備無患斷不敢稍涉疏懈自干重咎臣等謹合詞恭摺復陳伏乞皇太后皇上聖鑒訓示謹奏光緒十年四月二十六日

光緒十年五月十六日軍機大臣奉旨覽奏均悉卽著穆圖善等就現有各營及兵輪蚊船妥籌布置認真操防以期有備無患欽此

（五九三）附件一 穆圖善奏和議雖定仍嚴密辦防片

再正擬拜摺間復欽奉寄諭自來能戰而後能和著臣等嚴申儆備務臻周密等因欽此並准署直隸督臣李鴻章電信和議已定簡明五條後再議詳細章程彼兵漸撤我防暫緩等語臣等伏思和局有定原屬朝廷寬大之仁然卽從此息爭濱海各省防務正宜力籌持久

練兵簡器以圖自強臣等於應辦之事照前督催續募之軍未敢停撤台防尤關緊要並經嚴飭在事文武實力經理務求嚴密勿事張皇除續辦情形另再奏報外臣等謹附片復陳伏乞聖鑒謹奏

光緒十年五月十六日軍機大臣奉旨知道了欽此

（五九四）雲貴總督岑毓英奏據險設防力保紅江上游摺

光緒十年五月十七日到
光緒十年四月二十一日發

雲貴總督臣岑毓英跪奏爲遵旨詳細覆奏並據險設防力保紅江上游恭摺密陳仰祈聖鑒事竊臣於光緒十年四月初八日會將官兵撤回大灘保勝等處佈置防守各情恭摺密奏在案四月十六日承准軍機大臣密寄三月二十二日奉上諭岑毓英奏北甯失陷興化等處佈置防守並隨時激勵劉團暨請賞給越南官兵餉銀各摺片等因欽此仰蒙聖訓周詳感悚莫名伏念臣本庸愚謬司軍旅不能圖報萬一自問難安惟興化城小近江四面受敵早邀聖明洞鑒臣自到防以來督飭將士將地營佈置周密恆思誘敵來攻挫其鋒銳故正月飭劉永福下戰書以激之無如彼族偵知防備嚴密不肯來攻只屢次隔河開礮牽制

以大股往攻北甯經臣兩次派劉永福吳永安先後帶各營往援又奏請增餽募勇分道進規甯平爲釜底抽薪計嗣因北甯太原相繼失守劉團潰退軍火軍裝失落頗多法人勾結各處教匪阻截軍糧並由太原分股出端雄窺伺清波夏和圖抄官軍後路地面太寬防不勝防興化糧少難守經臣於二月二十九日據實密奏請旨退守邊境拜摺後支持十餘日因糧已罄盡迫不得已始飭各將領先將病卒軍裝用小船運上館司並於興化城內外安置地雷挑留奮勇弁兵在後埋伏於三月十二三十三十四等日將各營撤退欲誘法人入城轟之迫法人不入穀始將地雷點燃焚燬城營結隊徐行至清波夏和地面教匪沿途邀截均經官軍擊散因無城池糧米不能駐紮遂齊到鎮安縣之館司關臣查點各營軍裝病卒俱無遺失卽陸續拔上大灘文盤州保勝等處分紮防守三月二十六日有法人並教匪數百人分水陸兩路追至夏和與館司交界地方經劉團後隊截擊生擒法國小兵頭一人法兵一人解驗屬實臣已咨呈總理衙門辦理在案此官軍由興化退出之詳細情形也電報所云華軍將城焚燬退走實屬相符仰蒙天恩高厚鑒臣苦衷不加之罪著臣酌量兵力妥慎籌辦以力保邊疆門戶爲要又欽奉諭旨由各省關添撥銀一百萬兩以資軍餉恩施逾格感激涕零臣卽捐糜頂踵不足以稍報涓埃竊維進取必須添兵守邊貴乎持久臣前奏

帶萬人出關駐守山西換出劉團黃佐炎分道進取乃未奉命而山西先失遵旨馳到前敵佈置原期與北寧粵軍互相聯絡力圖補救孰意變生不測臣前奏明添募各營又因路遠遼難趕到事已至此只得奏明截止暫緩添募並將各營病卒給假認真裁併以節餉需仍就現有兵力督同劉團分守大灘文盤保勝紅江上游一帶及宣光之河湯等處使法人不能收紅江之利此數處有險可恃無後顧之憂可以持久激勵劉團時出清波夏和擊其不備彼族亦難安枕或可圖就轉圜至滇江關邊地皆險要并已抽撥勇營征調團練分途扼紮官民一心堪以固守臣駐紮保勝一帶往來照料不敢疎懈前奏請賞發南官黃佐炎等月餉銀一千兩只發過一月原欲藉資羈縻令該南官已逃走不知下落此項月餉請即停止臣素知國帑維艱力求撙節斷不敢稍事虛糜致滋咎戾所有遵旨詳細覆奏各情謹恭摺由驛密陳伏乞皇太后皇上聖鑒訓示謹奏光緒十年四月二十一日

光緒十年五月十七日軍機大臣奉旨覽奏已悉即著該督督同劉團扼要駐紮固守邊境所需餉項仍由該督給發至所獲法兵二人著妥爲看守聽候辦理餘依議欽此

再兵法知彼知已百戰不殆今洋人所長者船堅礮利中國所長者地廣兵多而各省軍情彼此互異查滇省原用明火鎗礮自同治七年始採買前膛洋鎗間雜使用迨十二年全省肅清經臣奏請截止嗣後亦未添購合計全省綠營練營所存前膛洋鎗通共不足萬桿除朽壞及分留各標鎮協營操防外各營帶來前敵不過四千餘桿至後膛快鎗僅有上年奉旨由北洋南洋大臣撥發呖者士得兵鎗馬鎗共二千桿及臣由福建帶來士乃打後膛鎗一千桿而呖者士得鎗每桿只有瑪子二百顆士乃打鎗每桿只有瑪子一百顆此兩號洋槍除分給劉團使用外僅共有二千數百桿各項瑪子只數數戰之用本年奉旨由北洋南洋大臣分撥之後膛槍礮暨通致使臣吳大澂協助之快槍瑪子均因粵軍需用緊急全數改撥歸粵軍應用臣前奏請由北洋南洋大臣撥發各瑪子係購自外洋運解尙需時日前委候選知府卓維芳赴粵採辦今始陸續解至滇省而數亦不多又查大礮僅有北洋南洋大臣發來之格林礮四位外有滇省仿造開花銅礮數十位皆不能擊遠兼之山路崎嶇輓運不易滇省未設電報沿途台站專用夫馬臣在營拜發六百里奏摺夾板必須五十七八日始能奉到諭旨其行文本省各地方近者往返十數日遠者經月軍情百變如雲每遇征調往往緩不濟急而法人以電報轉達軍情以輪船載運軍裝軍火以氣毬騰空窺探營盤

虛實其利害敏捷皆滇軍所不及現在防務方殷亟宜通盤籌畫惟軍火槍礮應如何酌盈劑虛之處出自聖恩謹附片密陳伏乞聖鑒謹奏

光緒十年五月十七日軍機大臣奉旨已有旨令李鴻章會國荃各撥給後膛槍一千五百桿洋礮四尊解滇應用矣欽此

（五九五）江西巡撫潘霽奏調練兵勇分駐要隘摺

光緒十年五月十七日到發
光緒十年四月二十八日到發

江西巡撫臣潘霽跪奏爲調練兵勇分駐要隘以固江防恭摺仰祈聖鑒事竊臣前奉寄諭籌辦江防業經臣將大概情形恭摺具奏並聲明或須酌籌添募隨時具奏辦理在案旋准兩江督臣咨會疊奉諭旨實力籌防總期有備無患等因復據電報該法兵船駛至吳淞各口各海岸因之戒嚴竊思江省地踞上游離海口尙遠惟夷情叵測輪船一水可通不得不格外嚴防臣卽咨湖口鎮臣丁義方調集舢板各船扼紮湖口等處隨飭內河江軍水師接續前進填紮險要飭親兵營及鎮武軍各營駐紮沿江各岸並咨九江鎮臣朱維森調集去年所撤選鋒各營並添募勇丁分守礮臺以固水陸各防復因江省兵力甚單向設各營每營僅祇勇丁二百五十名兼分防鹽卡各處零星散布實未足以資守禦遂飭各營歸併添

募成營改發洋槍朝夕操練以期有用庶有事足備調遣無事可資彈壓況內地教匪株連鈎結在在可虞不能不豫籌於先定謀於瞬息變換之頃因不敢任意更張致糜餉項亦不敢因循疏漏致誤事機以期仰副我皇上思患豫防之至意如夷人以通商爲重起而乞解自願轉圜則仰沐聖主如天之福薄海救安卽當撤調回防以期靜謐其詳細章程臣分晰續陳所有調練兵勇分駐要隘以固江防緣由恭摺具陳伏乞皇太后皇上聖鑒訓示謹奏
光緒十年四月二十八日

光緒十年五月十七日軍機大臣奉旨知道了欽此

（五九六）軍機處寄署直隸總督李鴻章等上諭

光緒十年五月十七日
洋務檔

軍機大臣字寄前大學士署直隸總督一等肅毅伯李鴻章兩江總督一等威毅伯曾光緒十年五月十七日奉上諭岑毓英奏軍火槍礮不敷應用等語現在滇省邊防緊要所存槍礮等件無多自應速籌接濟著李鴻章會同岑各撥給後膛槍一千五百桿洋礮四尊迅解雲南交岑毓英應用毋稍遲緩將此由五百里各諭令知之欽此遵旨寄信前來

(五九七) 軍機處寄總理各國事務衙門上諭

光緒十年五月十七日
洋務檔

軍機大臣字寄總理各國事務衙門前大學士署直隸總督一等肅毅伯李光緒十年五月十七日奉上諭左中允崔國因奏建設鐵路則調兵轉餉運漕均可迅速且通商惠工可奪外洋之利等語鐵路一事前經諭令李鴻章等會議以需費至鉅未卽興辦惟此等創舉之事或可因地制宜酌量試辦現在雲南廣開礦務山西採運鐵斤轉運艱難曠時糜費如可就開採之地量爲創造以省運費而裕利源亦屬自強之一策是否可行著總理各國事務衙門會商李鴻章詳加酌覈妥籌具奏原摺均著摘抄給與閱看將此諭知總理各國事務衙門並諭令李鴻章知之欽此遵旨寄信前來

(五九八) 北洋大臣李鴻章來電

光緒十年五月十八日到
電報檔

密頃接廣西潘撫十六諒山來電云入夏瘴作一營病至一二百人御製平安丹一服卽愈無不感頌皇仁王德榜久病初起該軍自南關至諒山谷松相去百六十里往來籌布加以整理潰勇勞瘁實甚懇辭署篆實係力難兼顧新會奏保蘇元春署提篆與粵軍最爲浹洽其精力亦在馮子材之上勦辦莫逆著有微勞伏乞轉致總署代爲婉陳以明王德榜非敢

違命也等語可否代奏乞酌鴻臚

人（五九九）刑部代遞主事申尙毅條陳摺

光緒十年五月十八日到
光緒十年五月十六日發

刑部尙書臣恩承等謹奏爲據情代奏事竊臣部額外主事申尙毅現有條陳時務敬陳管見呈請代爲轉奏臣等公同閱看尙無違悖字句未敢壅於上聞謹將該員原摺令該員自行封固恭呈御覽伏乞皇太后皇上聖鑒謹恭摺代奏光緒拾年伍月拾陸日刑部尙書臣恩承尙書臣張之萬左侍郎臣宗室桂全左侍郎臣薛允升（差）署左侍郎臣孫毓汶（差）暫署左侍郎臣廖壽恆（差）右侍郎臣文暉右侍郎臣許庚身

（五九九）附件一 刑部主事申尙毅請勿言和摺

光緒十年五月十八日到
光緒十年五月十六日發

刑部額外主事臣申尙毅跪奏爲衆說易淆宸謨宜斷擬請速伸天討立振國威外懾驕戎內綏藩服以紓公憤以固民心恭摺仰祈聖鑒事竊臣於上月自廣東浮海入都恭讀三十四連日懿旨諭旨敬知法夷侵越窺我屏藩內外軍政大臣不能振奮有爲以致北寧失事中朝震怒凡罪有應得或在軍前正法或卽拏問來京或則遷謫罷閑近而懿親疏而耆

舊議親議貴弗事姑容赫赫天威詞嚴義切臣愚無識竊意朝命傳後內外大臣必能戮力同心整軍決戰念列聖創垂之不易體皇躬宵旰之焦勞雪文宗顯皇帝未雪之憤集穆宗毅皇帝未集之勳將念載不共戴天之仇胥伸於一旦矣詎半月以來外間傳聞又有以和議進者噫何其見之左也臣濫列刑曹分不獲與廷議未知衆論之異同何似建議之意見何居然以臆見揣測之知彼首主和議者雖曰持重老成計周慮密亦不過謂夷人將弁之猛士馬之強器械之精糧餉之富有非我內地所能及者並或謂我帑項挾虛度支曷竭海濱廣闊防守難周且戰法仿效西軍則操演驟難精熟兵器須用新式則購製未易齊全與其勉強會戰而勝負未可知何如將就請和而兵戈可無事乎又况法越交兵本非華洋構釁但使申明舊約重訂新章夷人不事誅求於我有何傷損矣臣想彼主和之言大端當不外此顧此等議論一開必有惑於其言相爲附和者蓋凡事當震撼危疑之會人每憂艱鉅之難勝或畏避不前或惶惑莫決一得名望素著者倡一說焉以便於私圖而洽於衆志則人人樂得翕然從之將大局之安危必不復計問倘非有深識時務確悉夷情之員決大疑定大計指陳利害以破議和之錮習以成決戰之鴻勳其不至淆亂兵機貽誤大事幾何哉臣謹就近來親歷兩湖三江以及浙閩廣東直省特意採訪民心夷情戰守形勢凡得之耳

聞目見確切不易者計和之害七戰之利六敬爲我皇太后皇上切實陳之臣聞去冬總理衙門照會各國之文有越南本我藩邦法人無故侵佔以及我兵據守之處不讓法人一步如法人進逼定與決戰等語詞義煌煌中外共見允宜遵守此約不得視爲具文乃今法夷越紅河攻北寧將我兵所守城池礮台概爲奪據此不決戰更待何時若舍戰議和是自食前言恐各國視總理衙門所爲直如小兒怒罵喜笑茫無定局將何以昭信諸國而明誓天下乎夫令出必行禁止必止不行不止禁令奚爲禁弛令移成何國體和之害一北寧爲越南腴壤滇粵通衢法夷久已垂涎惟恐難得倘彼早經得手其勢逼近滇粵必然窺我邊陲幸爲劉義兩創挫傷銳氣彼深恐我軍助劉夾擊力不能支故自去冬增餉集兵遲至今春乃敢前進從前在事諸將儻能乘早助劉攻取彼兩面受敵進退均難必屈意請成何至北寧有失惜當事擁兵不動坐失先機致夷人募集新軍取北寧如拾芥今卽力戰恢復而路徑爲賊所悉據守已難於前況不戰就和直置北寧於不問目前雖可了事能保其長守和約終不犯我邊省乎如謂終不犯邊試問彼必得北寧而後甘心者欲何爲哉明明欲據要地屯重兵以窺我中原將休息一二年西入滇北驅粵滇粵沿邊數千里處處可通防則我多歧路而難防勦則彼據要津而難勦戰則餉糈倍多於今日和則要求更甚於昔年揖盜

入門坐使滋蔓他族逼處悔切噬臍和之害二法夷侵吞南越各國慮中原救護故坐觀成敗於旁然夷狄貪得之心豺狼無厭利之所在羣起相爭况前和約中載有此國獲利各國均霑之語適足藉爲口實啓其覬覦今若隱忍就和棄越南如敝屣將二百餘年藩屬一旦甘心予人在法夷滿志躊躇此時復何需索第恐諸夷慕利迭起效尤近援越事爲先聲遠引約章以要挾萬一稍拂其意必致英人窺其西日人逼其東俄人割於北葡人據於南舉通商十餘邦皆起而乘我之虛奪我之利將外焉而列藩之高麗蒙古三藏緬甸以及廓爾喀布魯特哈薩克鄂倫春各國部凡與敵壤交界者究難免迫脅割據之憂內焉而沿海之瓊州臺灣舟山崇明各府縣凡在海濱孤立者終必有攻奪盤踞之禍四面紛擾抵隙投環彼時解說之則衆楚一齊理不能喻力敵之則彼多我寡勢不能爭惟有以地與人如法之求和而後已是息事愈以滋事弭兵適以興兵和之害三法人自入中原行教以來海濱山陬無處不到始則挾朝廷以令官府繼則抗官吏以納逋逃終則藉黨徒以凌士庶入教者有罪竟可生全毀教者無罪亦能致死勢燄赫赫官民畏威又或假行教以探險要關津藉施捨以結游惰無賴奸謀詭計薄海周知士民含憤日深衆心躍躍欲動其隱忍未發者以朝廷禁令森嚴故任夷人欺侮耳昨聞彭玉麟奉詔督師羣意戰機已決磨拳擦掌只將中

外交戰卽驅除非族焚毀教堂一時天主教中聞風震恐爲首者遠竄潛逃爲從者通行反教於是法之黨援減而氣餒衰矣今若再事優容復尋和好彼既佔我南越益壯聲威必自詡西較中強人亦疑華非夷敵前之反教者又將蟻附蠅營重入邪黨更必鑽門尋路煽惑多人以結新來主教之歡以贖從前反教之罪從此一心歸教牢不可破矣歸教久則爲教首爲教首則攬教徒黨徒收拾愈多則主首聲勢愈大彼之恣橫愈甚則民之憤怒愈深怨毒難消爭端尋起將久壅必潰者民也邪謀得助虐燄方張將勃發莫遏者教也和之害四海防之設原以外禦諸夷旣練習於無事之時宜收效於有事之際直督李鴻章首倡以洋器制洋人之策駐節津沽統籌防務十有餘年歲費帑金數百萬所購機器軍械洋槍水雷鐵甲船開花礮不知凡幾又厚聘洋師以練勁兵優保局員以習夷務但有切於實用者朝廷無不信從任專且久千古一時其所籌畫經營以之自守固當有餘以之制敵宜無不足今法夷啓釁利器正可奏效奇才亦足建功爲當事計辦理果有成規宜於此時選熟悉夷務之能員統練習西法之精兵用購得洋人之利器親身督戰及時試鋒以報皇上恩遇之隆以副天下責望之重儻舍此不務遷就言和是自問旣不信心對敵全無把握徒以朝廷每歲之巨帑爲粉飾一時之具文中外聞知能無譏笑甚至貪官巧宦常則藉防務以梯榮

射利變則援和局以謝責保身耗庫財資敵富墮軍實縱寇讎是誰爲厲之階也和之害五朝廷刑討所加用以肅百僚而威天下允宜風行雷厲不可先決斷而後優柔以啓臣下嘗試之漸臣竊思前月以北寧之故迭降嚴旨將在事諸將分別治罪不稍姑容一時內外臣民咸懷然於天怒之森嚴有勝於雷霆之發聾振聵者卽外洋各國亦皆傾心側耳逖聽風聲以爲中朝之討法夷決戰在於此日矣乃曾幾何時竟有敢進和議以倡於衆者臣愚無識竊謂一月之久始則嚴究不戰之罪以顯誅於野繼則寬就主和之說以昌議於朝威愛迥殊何以服罪將之隱不特此也彼首倡和議者分明知拏敗將易樞臣宸衷志在攘夷力宜振作乃不進防勦之策以贊成廟算而共濟時艱輒倡爲和好之謀以嘗試天聰而搖惑衆志阻撓大計顛倒是非彼其居心爲何如哉倘今聽彼定和不復興師問罪是大廷征伐之鈞柄操縱由彼施爲累朝脣齒之藩封取舍憑伊掌握此次和議一定海內聞知將謂主和者之權重位尊直駕親舊師保督撫將帥內外大臣之上故每一建議朝廷無不屈從者從此風聲一播凡希榮勢之輩必相率而歸附之其流弊則不堪問矣何也事有相因而至威以漸積而成在首主和者身受重恩上榮祖宗下廕孫子旣優且渥豈忍負盡天良無如權利所歸黨援日盛迨成積重難返之勢必有尾大不掉之憂彼雖欲保全身名然有不能